

Perlis giat lahirkan bakat baru golf

Oleh MUHAMMAD DAYNE AZMIN

dayne.ghazali@utusan.com.my

um/5.6.13/3011/E1

SERDANG - Raja Perlis, Tuanku Syed Sirajuddin Putra Jamalullail berkenan melancarkan majlis promosi Kejohanan Royal Perlis Celebration Golf 2013 di The Mines Resort & Golf Club, semalam.

Ia merupakan penganjuran kali ketiga sejak 2011 dan memilih tema 'Fantastic 70' sebagai mengingati ulang tahun kelahiran baginda dengan objektif kejohanan tahun ini mencungkil bakat baru dalam sukan golf.

Selain itu, ia juga bertujuan mempromosikan Perlis kepada pemain profesional dan amatir Malaysia serta peringkat antarabangsa sebagai destinasi sukan golf.

Menurut Pengerusi Kejohanan Royal Perlis Celebration Golf 2013,

Datuk Seri Diraja Syed Razlan Putra Jamalullail, penganjuran kejohanan itu dijangka lebih meriah berdasarkan sambutan awal yang diterima.

"Perkara yang menjadi perhatian utama adalah mahu melihat sejauh mana kemampuan dan skil pemain muda golf negeri yang telah dilatih sejak tahun lalu.

"Pada 2012, kita telah menyaksikan begitu ramai pemain muda menyertai klinik sukan golf yang dianjurkan oleh penganjur The Mines," katanya dalam ucapan pada majlis perasmian Kejohanan Royal Perlis Celebration Golf 2013, di sini semalam

Buat masa ini, seramai 70 pemain muda yang dilatih oleh Perlis di bawah pembangunan sukan golf.

Turut berangkat sama ialah Raja Muda Perlis, Tuanku Syed Faizu-

ddin Putra Jamalullail, merangkap Presiden Kelab Golf Putra (KGP) Perlis dan Menteri Besar Perlis, Azlan Man.

Antara acara yang akan diadakan dalam Royal Perlis Celebration 2013 ini adalah pertandingan skil golf junior, kejohanan VVIP Pro-Am dan kejohanan utama yang bertempat di Kelab Golf Putra, Perlis pada 22 dan 23 Jun.

Seramai 130 peserta telah mengesahkan penyertaan dalam semua kejohanan yang dianjurkan dan sambutan pada tahun ini dijangka lebih hangat berbanding dua edisi sebelumnya pada tahun 2011 serta 2012.

Selain itu, turut diadakan beberapa program yang melibatkan orang ramai seperti kejohanan Sepak Raga Tuju dan Karnival 'Jom Mai' Perlis.



TUANKU Syed Sirajuddin Putra Jamalullail (dua dari kanan) merasmikan Kejohanan Royal Perlis Celebration Golf 2013 di The Mines Resort & Golf Club, Serdang, semalam. Berangkat sama Tuanku Syed Faizuddin Putra Jamalullail (tiga dari kanan), Azlan Man (tiga dari kiri) dan wakil The Mines Resort & Golf Club, Diana Lee (kiri). - UTUSAN/AIZZUL A.MAJID